

03 NOV 2002

BN-Abim

ABIM HARAP PEMBANGKANG SAMBUT TAWARAN DR MAHATHIR

KUALA LUMPUR, 3 Nov (Bernama) -- Angkatan Belia Islam Malaysia (Abim) berharap parti-parti pembangkang menyambut pelawaan Datuk Seri Dr Mahathir Mohamad untuk bekerjasama dengan Barisan Nasional dalam mempertahankan kepentingan negara.

Presiden Abim, Ahmad Azam Abdul Rahman berkata, pelawaan Perdana Menteri itu tepat pada masanya jika diambil kira isu keganasan yang dikaitkan dengan negara ini.

"Abim melihat tawaran PM sebagai harapan rakyat untuk menghadapi ancaman luar yang sememangnya nyata terhadap negara," katanya kepada Bernama.

Dr Mahathir, yang juga Pengerusi BN, membuat tawaran itu termasuk membuka pintu keanggotaan BN kepada parti-parti pembangkang, ketika merasmikan Konvensyen BN Pulau Pinang semalam.

Ahmad Azam berkata pentingnya rakyat bersatu padu menghadapi ancaman luar semakin mendesak ekoran tindakan yang diambil oleh beberapa negara terhadap Malaysia.

Beliau memberikan contoh tindakan Australia membatalkan dua acara yang telah dirancang untuk diadakan di Malaysia serta langkah negara Barat meminta rakyat mereka lebih berhati-hati untuk ke negara ini.

"Tindak tanduk negara barat yang menganggap Malaysia seolah-olah sarang pengganas memerlukan komitmen rakyat untuk sama-sama menanganinya," katanya.

Ahmad Azam berkata tawaran Dr Mahathir itu membuktikan komitmen beliau untuk bekerjasama dengan semua pihak termasuk parti-parti pembangkang dalam isu-isu yang mempunyai kepentingan bersama.

Beliau melihat tawaran itu sebagai susulan kepada penyertaan Perdana Menteri pada Syarahan Perdana anjuran Abim dan Dewan Bahasa dan Pustaka bagi membincangkan masalah Palestin dan kemanusiaan pada 8 Mei lepas.

Majlis itu turut disertai pemimpin-pemimpin tertinggi Pas.

-- BERNAMA

AZZ MUN MAI